

**Inatsisit attuumassuteqartut allanngortinneqarnissa  
annut siunnersuummik UPA 2016-imut Naalakkersuisut suliniuteqaqqullugit  
peqquneqarnissaat pillugu Inatsisartut aalajangiiffigisassaattut siunnersuut,  
taamaaliornikkut inoqutigiit 400.000 kr.-t ataallugit isertitallit napparsimasut  
angerlarsimaffianni nerisaqarnermut ineqarnermullu  
akiliuteqartarunnaarsinnaaqqullugit.**

(Inatsisartunut ilaasortamit Anthon Frederiksenimit, Partii Naleraq, saqqummiunneqartoq)

**aamma**

**Pinartumik napparsimasoqartillugu ilaqutaasut Københavnimi kalaallit peqqissartut  
najugaqarfianni ineqartinneqartillugit ineqarnermut aningaasartuutit 2016  
aallarnerfigalugu pisortanit akilerneqartalernissaat sulissutigeqqullugu Naalakkersuisut  
peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortamit Mimi Karlsenimit, Inuit Ataqatigiit, saqqummiunneqartoq)

**pillugit**

**Ilaqutariinnermut Peqqissutsimullu Ataatsimiititaliap isumaliutissiisutaa**

**Siunnersuutit aappassaaniigassanngorlugit saqqummiunneqartut**

Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Tillie Martinussen, Demokraatit, siulittaasoq

Inatsisartunut ilaasortaq Jess Svane, Siumut, siulittaasup tullia

Inatsisartunut ilaasortaq Laura Tàunâjik, Siumut

Inatsisartunut ilaasortaq Vivian Motzfeldt, Siumut

Inatsisartunut ilaasortaq Aaja Chemnitz Larsen, Inuit Ataqatigiit

Inatsisartunut ilaasortaq Juliane Henningsen, Inuit Ataqatigiit

Inatsisartunut ilaasortaq Mimi Karlsen, Inuit Ataqatigiit

UPA 2015-imi ulloq 21. april 2015-imi siullermeerinerup kingorna siunnersuut  
ataatsimiititaliamit sukumiisumik misissorneqarpoq.

**Siunnersuutit imarisai siunertaallu**UPA2015/58

Inatsisit attuumassuteqartut allanngortinneqarnissaannut siunnersuummik Naalakkersuisut kingusinnerpaamik UPA2016-imi suliaqarnissaannut peqquneqarnissaat Inatsisartut tapersiissasut siunnersuuteqartup aalajangiiffigisassatut siunnersuuteqarnermigut kissaatigaa, taamaaliornikkut inoqutigiit ukiumut 400.000 kr.-t inorlugit isertitalit qanigisaminnik angalaqateqartillutik napparsimasut angerlarsimaffianni nerisaqarnerminnut najugaqarnermullu akiliuteqartarunnaarsinnaaqullugit.

UPA2015/115

Pinartumik napparsimalersoqartillugu napparsimasut ilaquataat Københavnnimi napparsimasut angerlarsimaffianni inissinneqarsimasut najugaqarnerminni aningaasartuutigisaat pisortanit akilerneqartalernissaat 2016 aallarnerfigalugu piviusunngortinneqarnissaa Naalakkersuisut qulakkiissagaat siunnersuuteqartup siunnersuuteqarnermigut kissaatigaa.

**Siunnersuutit Inatsisartuni siullermeerneqarnerat**

Siunnersuutit imarisamikkut assigiissuseqarmata ataatsikkut suliarineqarput.

Naalakkersuisut aningaasaqarniarnikkut ilungersunartumik inissisimaneq innersuussutigalugu siunnersuutit akuerineqarnissaat innersuussutiginnigilaat. Akerlianilli pinaveersaartitsinermut suliniutinut angerlarsimaffiinilu imaluunniit sapinngisamik angerlarsimaffinnut qanittumi katsorsaanernut aningaasat atorneqarnissaat pingaarnerutillugu nalinginnaasumik Naalakkersuisut sulissuteqarusupput.

Partiit tamarmik siunnersuutigineqartut iluaraat, siunnersuutinili innersuussutigineqartut isumaqatigiinngissutaalluni. Napparsimasut ilaquataannut ullumikkorninngarnit annertunerusumik aningaasaliisoqaqqinnissaa Demokraatit itigartippaat. Akerlianik Partii Naleqqap aamma Inuit Ataqaatigiit siunnersuutit tapersorsorpaat. Taamaakkaluartoq taamaallaat siunnersuutigineqartut 1.2 mio. kr.-t iluini sinaakkusiunneqartut imaluunniit Københavnnimi napparsimasut angerlarsimaffianni ullumikkut ilaquataasut ineqarnermut nerisaqarnerinullu isertinneqartartutut nalunaarsorneqarsimasut nalingi kisiisa Inuit Ataqaatigiit tapersorsorlugit erseqqissaatigaa. Siunnersuutinut assigiimmik nalunaaruteqarlunik allannguutissanut siunnersuuteqarnissaq pillugu isumaqatigiinniarnikkut isumaqatigiittoqassappat taava Inuit Ataqaatigiit tamatumunnga soqutiginnissinnaapput. Partii Naleqqap siunnersuutit tamaasa tapersorsorpai erseqqissaatigalugulu naalakkersuisooqatigiinniarniluni isumaqatigiisummut siunnersuutigineqartut tulluartausut taamaattumik naalakkersuisooqatigiit siunnersuummut akuersaartumik pissuseqarsimassasut naatsorsuutigineqartariaqartoq.

Napparsimasut – aamma ilaquataasut sullinneqarnerinut pingaartumik Københavnnimi napparsimasut angerlarsimaffiannut inissinnermi aningaasatigut killissarititaasut apeqqutaatinnagit sukumiisumik misissuinermik ingerlatsisoqartariaqartoq Atassut isumaqarpoq, partiimit qularutigineqanngilaq pitsanngorsaatinut inissaqartoq.

Inuunermik akeqarsinnaasumik pinartumillu napparsimasut sapinngisamik ilaquuttaminnik najorneqartarnissaat pingaaruteqartoq Siumup saqqummiuppaa. Aammattaaq Siumup oqaatigaa isumaqatigiissutit aqqutigalugit pineqartumi piginnaatitaaffiit pitsanngorsarneqarnissat qulakkeerneqarsinnaasoq. Siunnersuutitut Siumut erseqqissumik isumminngilaq, partiimit periarfissat sukumiinerusumik misissorumaneqarmata.

Tamanna tunngavigalugu siunnersuutit Ilaqutariinnermut peqqissutsimullu Ataatsimiititaliami suliarineqartussanngorlugit innersuunneqarput.

### **Ataatsimiititaliap siunnersuutitik suliarinninnera**

#### UPA2015/58

Siunnersuut taasissutigineqartussaq (qulequtaq) ataatsimiititaliap paasinninnera naapertorlugu siunnersuuteqartup ilaquataasut angalaqataasut nerisaannut ineqarnerannullu aningaasartuutit kisimik pineqartut inoqutigii katillugit 400.000 kr.-t ataallugit ukiumut isertitaqartartut akiliuteqartannginnissaat pivaa. Tunngavilersuummi allassimavoq ilaqutariit nappaammik eqqugaasut illoqarfigisamiit uninngavigiartukkamut angalaneritut aningaasartuutaat aamma matussuserneqartassat. Taamaakkaluortoq taasissutigisassaq ataatsimiititaliamit isummerfigineqartariaqarpoq, taamaalilluni ataatsimiititaliami suliaqarnermi ilaquataasut angalaqataasut nerisaannut najugaqarnerinullu aningaasartuutit kisimik ilaatinneqassallutik. Siunnersuuteqartup taasissutigisassami napparsimasut angerlarsimaffiat kisiat oqaatigimmagu, siunnersuummi Københavnnimi napparsimasut angerlarsimaffiat kisiat pineqartutut ataatsimiititaliamit tanngavigineqartariaqassaaq.

#### UPA 2015/115-imut

Siunnersuut ataatsimiititaliap paasinninnera naapertorlugu, Københavnnimi napparsimasut angerlarsimaffianni ilaquataasut najugaqarnerminni nerisaqarnermut ineqarnermullu (akunninnermi aningaasartuutit) aningaasartuutit pisortanit matussuserneqartussat kisimik pineqarput. Pinartumik ilungersunartumillu napparsimasut Københavnnimi napparsimasut angerlarsimaffinni najugaqartut ilaquataat siullertut salliutinneqartariaqartut siunnersuuteqartup erseqqissaatigaa. Siunnersuuteqartup aamma oqaatigaa, ilaquataasut tamarmik najugaqarnissaannik qulakkeerisoqarnissaa siunnersuummi siunertarineqanngimmat, napparsimasut najugaqarnissaat qulakkeerneqaaqartariaqarmat. Napparsimasunut allanut inissamik tigusivallaassanngikkaanni ilaquataasup ineqatigalugu sineqatigisinnaanera periarfissaasariaqarpoq.

Siunnersuutigineqartut marluk ataatsimiititaliap paasilluarsinnaavai. Napparsimasut nunatta avataanut innersuunneqartut ilungersunartorsiortarput sanngiittarlutillu, napparsimasunullu pineqartunut ilaqutaannullu atugassarititaasunik sapinngisamik oqilisaassisariaqarpugut. Napparsimasut ilungersunartumik napparsimanerminni ilaqutaasa najuunnissaat periarfissaqartariaqartoq assortorneqarsinnaanngitsumik pingaaruteqarpoq. Ilungersunartumik atugaqarnermi qanigisanit qanilaarfingineqarnissaq tapersersorneqarnissarlupingaaruteqartorujussuuvoq.

Napparsimasoq pinartumik inuunerminik ulorianartorsiorluni ilaatigut Københavni napparsimasut angerlarsimaffiannut angallassigasuarnermi ilaqutaasut napparsimasunut ingiaqateqartarnej pillugu malittarisassat atuuttut naapertorlugit ingiaqataasinnaanerat ataatsimiititaliamit maluginiarneqarpoq. Aaqqiineq nakorsamit suliarinnittussamit pinartumik inuunermik ulorianartorsiortoqartillugu aalajangerneqarpat ataatsimiititaliaq naapertorlugu silatusaarnerussaaq. Akissuteqaammi allassimavoq najugaqarnermut nerisaqarnermullu napparsimaviup pisussaaffii atorunnaartartut napparsimasup peqqissusaa pinartumik inuunerminik ulorianartorsiorunnaartut nalilerneqaraangat. Taama inatsisitigut inissisimaneq ataatsimiititaliamit tapersersorneqarpoq. Meeraq 18-t inorlugit ukiulik illoqarfigisami avataani suliarineqartussaq ilaqtaminit ingiaqatigineqarnissani pisinnaatitaaffigaa taamaattuaannartariaqarlunilu.

Ilaqutaasut kikkut napparsimasumik ingiaqataassanersut nalinginnaasumik ajornartorsiutaanissaa ataatsimiititaliamit ilisimasaqarfigineqanngilaq.

Taama oqariarluni Kalaallit Nunaanni Napparsimaveqarfik susassaqartut allat inuiaqatigiinnilu sumiiffinni allani aningaasaqarnikkut akisussaassuseqartumik ingasaassinaveersaarnermillu takutitsisariaqarput. Aningaasartuutini pingaarnersuineq peqqinnissaqarfiullu ataani sullissineq pingaarnertut napparsimasumut sammitinneqartariaqarput.

Siunnersuutit assiippiangillat. UPA 2015/115-imut siunnersuummi ilaqutaasup ingiaqataasoq pissarissaartuunersoq pissarissaartuunnginneraluunniit apeqqutaangillat. Pinartumik (inuunermik uloriarnartorsiortunik) napparsimalernerup kingunerisaanik Københavni napparsimasut angerlarsimaffiannut inissinneqarsimasut innersuunneqarsimasulluunniit ilaqutaasa tamarmik nerisaqarnerinut najugaqarnerinullu pisortat akiliisassapput. Siunnersuuteqartoq naapertorlugu siunnersuummut atatillugu aningaasartuutit aningaasaqarnikkut killissarititaasut iluini 1.2 mio. kr.-t-usinnaapput.

Oqaatigineqareersut UPA 2015/58-imi taasissutigineqartussamut immikkoortumi pingaarutilimmi tunngavilersuutitullu saqqummiunneqartut imminnut akerleriipput. Soorlu erseqqissaatigineqartoq taasissutigisassami oqaasertaliunneqartoq napparsimasup immikkut

Københavni napparsimasut angerlarsimaffiannut suliaritikkiartornerminut atatillugu najugaqariartortussanngorlugu innersuunneqartup ilaqtai kisimik pineqanngillat illuatungaatigulli siunnersuuteqartup saqqummiuppaa siunnersuummi aningaasatigut sinaakktissat 1.2 mio.-t missaasa iluini ingerlanneqarsinnaasoq naatsorsuutigineqartoq. Taamaalluni siunnersuutigineqartoq Københavni napparsimasut angerlarsimaffiannut taamaallaat attuumassuteqartoq ataatsimiititaliamit isumaqarfigineqarluni.

Danmarkimi nunatsinniluunniit napparsimavinni napparsimasup ilaquataasaluunniit illoqarfiginngisaani napparsimasut suliarineqartussaatiillugit assigiimmik pineqartariaqartut ataatsimiititaliaq tunngaviusumi isumaqarpoq. Akerlianilli siunnersuutip aningaasaqarnikkut kingunerisassai 1.2 mio. kr.-t missaanik aningaasatigut naatsorsuutigisanit annertunerujussuunissaat ataatsimiititaliamit ilisimaneqarpoq.

Siunnersuuteqartut marluullutik siunnersuutini aningaasaqarnikkut killilimmik sinaakkuteqartitsinerat innersuussutigalugu napparsimasut Københavni napparsimasut angerlarsimaffianni najugaqartussanngorlugit innersuunneqarsimasut ilaquataat kisimik siunnersuummi pineqartut ataatsimiititaliamit isumaqarfigineqarpoq. Tamannalu taamaallaat napparsimasup inuunerminik ulorianartorsiornera imaluunniit pinartoqarnerata kingunerisaanik pisinnaalluni.

Pisortat ikiorsiissutaat pillugit malittarisassanut tunngatillugu, ilaquataasut ikiorserneqartarnissaannut atatillugu malittarisassat taakku qanoq eqqortumik kommuninit aqutsivigineqarnissaasa qulaajaasoqarnissaanik erseqqissaasiortoqarnissaanillu Naalakkersuisut kaammattorneqarput. Matumani malittarisassat ersarissuunissaat napparsimasumullu ilaquataasut assigiimmik pineqarnissaat qulakkeerumallugu.

Aammattaaq pisortat ikiorsiisinnaanerannut imaluunniit napparsimasup ilaquataanut ikiorsiisinnaanermut malittarisassat tunngavissaatinneqartut assigiinngitsut atorneqartarsimasinnaanerata ataatsimiititaliamit naapertuutinngitsut isumaqarfigineqarpoq. Allaffissorneq eqqarsaatigalugu ataatsimik ersarissumik malittarisaqarnissaq perusunnarneruvoq. Malittarisassarpassuarnik pilersitsisinnaanerput mianersuuttariaqarparput.

Napparsimasunik ingiaqataasut imaluunniit ilaquattat qanigisat napparsimaviit akiligaannik napparsimasunik ingiaqataasussatut innersussutigineqarsimasut nerisaqarnerminnut najugaqarnerminnullu akiliuteqartassanngitsut ataatsimiititaliaq isumaqarpoq. Ilaqutaasoq ingiaqataasoq ingiaqataasussatut innersuunneqarsimangippat taava taanna ilaquataasoq tunngaviusumik napparsimaveqarfiup akigititai aalajangersakkat naapertorlugit nerisanut najugaqarnermullu akiliisussaavoq. Ilaqutaasoq ingiaqataanissamut innersuunneqanngitsoq napparsimasoq ineqatigalugu siniffissaqartinneqanngippat napparsimasut inissaannik tigusinngippat immikkut siniffilernissaanut akiliuteqartoqartariaqanngikkaluarpoq, inimi

tassani napparsimasumut taamaallaat aningaasartuutigineqartussat naatsorsuutigineqartarmat inilu pinngitsoorani eqqiarneqartussaalluni.

### **Siunnersuutit aningaasaqarnikkut allaffissornikkullu kingunerisassa.**

#### UKA 2015/58

Siunnersuutip piviusunngortinneqarnissaa siunertaralugu aningaasaqarnikkut kingunerisassai ukiumut 1.2 mio. kr.-t missaaniissinnaasut siunnersuuteqartumit ilimagineqarpoq. Inatsisip nutarterneqarnissaa suliarisinnaasat allaffimmiup suliarisinnaasaa 1/8-iata missaaniissinnaassasoq siunnersuuteqartup ilanngullugu naatsorsuutigaa, tassa 125.000 kr.-t nutserineq ilanngullugu missaaniillutik.

Siunnersuuteqartup aammattaaq oqaatigaa siunnersuutigineqartup kommunit pisortatigut ikiorsiissutaat pillugit malittarisassa at naapertorlugit ikiorsiisarunnaarsinnaasut tamannali qularnangaatsiarpoq.

#### UPA 2015/115

Siunnersuutip piviusunngortinneqarnissaanut aningaasartuutit Kalaallit peqqissartut angerlarsimaffiata isertitaanit tunngaviumik nassaarineqartariaqartut ataatsimiititaliamit maluginiarneqarpoq. Napparsimasut ilaqutaasa napparsimasut angerlarsimaffianni nerisarnerisa ineqarnerisalu kingunerannik 2013-imi 1.39 mio. kr.-inik aammalu 2014-imi 1.71 mio. kr.-inik isertitsisoqarpoq. 2015-imi 1.476 mio. kr.-inik isertitsisoqarnissaa naatsorsuutigineqarpoq. Kingullertigut naatsorsuinerit missingersuusiernerillu innersuussutugalugit siunnersuutip piviusunngortinneqarnissaanut 1.2 mio. kr.-t sinneqassasut ataatsimiititaliamit inernilerneqartariaqassaaq.

Siunnersuutini tamani takuneqarsinnaanngilaq ukiumut isertitassat amigaataalerumaartut aningaasanut inatsisini isertitassat qanoq aningaasalersorneqassanersut, kisianni tassa siunnersuutit ilusimissut iluseqartillugit piviusunngortinneqassappata isertitassat amigaataalersussaapput.

UPA 2015/58-imut siunnersuut piviusunngortinneqassappat annertunerusumik allaffissortoqalissaaq, napparsimasut ataasiakkaat inoqutigittut isertitaat 400.000 kr.-t ataassimaneraat imaluunniit qaangersimaneraat misissorneqartalissammat.

Pineqartut nerisaqarnermut ineqarnermullu akiliuteqartassanersut akiliuteqartassannginersulluunniit pillugu aalajangiisoqarnissaa siunertaralugu allaffissornikkut imaannaanngitsumik sulianik suliakkersuutaasussaavoq.

**Ataatsimiititaliap inassuteqaatai****2015/58-imut**

Qanigisatut ingiaqataasut Københavnimi kalaallit peqqissartut angerlarsimaffianni atugaasa pitsanngorsarneqarnissaannik siunnersuuteqartup kissaataa ataatsimiititaliamit tapersersornartinneqarpoq.

Siunnersuulli allaffissornikkut suliackersuutaavallaartussatut ataatsimiititaliamit isigineqarpoq. Qanigisaasut imaluunniit napparsimasup inoqutigiivisa ukiumoortumik tamakkiisumik isertitaasa 400.000 kr.-it sinnerneraat ataanneraalluunniit aalajangerumallugu ukiumoortumik nalunaarsukkat imaluunniit aningaasarsiat allagartaasa pissarsiarisarnissaat allaffissornikkut pisariuallaassaaq. Allaffissornikkut nammatassaq taanna siunnersuutip aningaasaqarnikkut toqqaannartumik kingunerisassaasa 1.2 mio. kr.-inik imaluunniit kontomi pingaarnermi 34.11.04-imi, Kalaallit peqqissartut angerlarsimaffianni, ukiumoortumik annerpaamik amerlaqataannik annertussuseqarnissaannik siunnersuuteqartup naatsorsuuteqarneranut sanillinneqassaaq. Allaffissornikkut aningaasartuutissaraluit taakku Københavnimi kalaallit peqqissartut angerlarsimaffianni uninngasunut taakkulu qanigisaannut ingiaqataasunut iluaqutaasussanngorlugit atorneqarnissaat ataatsimiititaliamit orniginartinneqarneruvoq.

**Siunnersuutip allaffissornikkut annertoorujussuarmik kinguneqarnissaa innersuussutigalugu ataatsimiititaliap isumaqatigiittup siunnersuut itigartinneqassasooq inassutigisariaqarpaa.****2015/115-imut**

Qanigisatut ingiaqataasut Københavnimi kalaallit peqqissartut angerlarsimaffianni atugaasa pitsanngorsarneqarnissaannik siunnersuuteqartup kissaataa ataatsimiititaliamit aamma tapersersornartinneqarpoq. Tamatumani pineqarmata napparsimasunut tassanngaannartumik ilungersunartumilluunniit nappaateqartunut qanigisaasutut ingiaqataasut.

Siunnersuutip isertitassaraluatigut annikinnerusumik annaasaqarfiulluni aningaasaqarnikkut kinguneqarnissaa innersuussutigalugu ataatsimiititaliap siunnersuut tapersersinnaavaa. Siunnersuutip allaffissornikkut kingunerisassai annikitsuaraasut ataatsimiititaliap maluginiarpa. Kalaallit peqqissartut angerlarsimaffianni napparsimasut ingiallortillit imaannaanngitsumik misigisaqarnerminni aningaasaqarnikkut immikkut artukkorsorneqannginnissaa ataatsimiititaliamit aalajangiisuusumik pingaartinneqarpoq.

Siunnersuutip piviusunngortinneqarnissaanut aningaasartuutit tunngaviusumik isigalugu kalaallit peqqissartut angerlarsimaffiata isertitaanit pissarsisarineqassasut ataatsimiititaliamit erseqqissaatigineqassaaq. Kalaallit peqqissartut angerlarsimaffianni napparsimasunut

qanigisaasut nerisaqarnermut ineqarnermullu akiliuteqarnerisa kingunerisaanik 2013-imi 1.39 mio. kr.-it 2014-imilu 1.71 mio. kr.-it isertinneqarput. Ataatsimiititaliamit naatsorsuutigineqarpoq isertitassatut amigaataalersussat annertugisassaangitsut ingerlatsinerup pitsanngorsarneqarneratigut matussuseqarneqarsinnaasut.

**Tamanna tunngavigalugu siunnersuut akuerineqassasoq ataatsimiititaliap isumaqatigiittup inassutigaa.**

Taama oqaaseqarluni isumaliutissiissummilu oqaatigineqartunik paasinnilluni siunnersuut ataatsimiititaliap aappassaaniigassanngortippaa.

---

Tillie Martinussen,  
siulittaasoq

---

Jess Svane

---

Laura Tàunâjik

---

Vivian Motzfeldt

---

Aaja Chemnitz Larsen

---

Juliane Henningsen

---

Mimi Karlsen